

Rosine... la paveute buine

Chel paisut dal Friûl al jere tant biel che al someave une cartuline inlustrade. Picinin, net, metût dongje un pôc a la volte, une cjase tacade di chês altre come par stâ in parie d'Istât e tignîsi cjalts d'Unvier; cu lis stradis netis e i cjaminis che a fumavin come vecjuts cu la pipe; cui fruts che a zuiavin di platâsi e cu lis feminis che a metevin a suiâ i bleons cjantant e ridint. Une piçule oasi di cuiete restade intate intun mont che al stave cambiant masse di corse.

Dut ator ator une grande schirie di prâts che a someavin strenzilu intun abraç di jerbe, flors che a profumavin l'arie e tantis, tantis paveutis che a svolavin e a jerin une gjonde pai voi dei int

Propit parsore dal pais, la mont dal S. Simeon e mostrave dute la sô majestositât e cul so fâ autorevul, e tignive a ments la int e la campagne dal dulintor. In face, invezit, si cjatave la mont Mariane, scarmuline, bieles e elegant ma ancje un fregul superbiôs e cetant braurôs.

I doi a lavin d'acuardi come il cjan e il gjat e si cjatavin da dî dispès....par no dî simpri. Une volte par cuistions di politiche e une altre volte pal sport; si cjatavin da dî pal balon ma ancje par chei che a corin in biciclete; par lis garis des machinis e soledut pe Moto GP, che il S. Simeon al jere un patût de Jamaha e jê invecit e tignive pe Ducati. Dut par lôr doi al jere motîf par une discussions cence fin ma, la cuestion plui grivie, e jere chês de bieles.

Jê e crodeva di jessi la plui bieles montagne di dute la Cjargne e lui invezit al contindeve che di mîr dal S. Simeon no 'nd jere in nissun puest. No jerin dal sigûr dôs montagnis modestis ma a jerin fatis cussì e la int lis sopuartave, magari riduçant e cjolintlis in zîr sotvie.

Fintrimai che une sere, dopo vês tirât par benon par une partide de Udinese cuintre la Juventus, pierdude dai nestris ben si intint.....i doi contindints a tacarin a discori di lôr e des lôr fuarcis. Si derin bataie a peraulis par un biel pieç e podopo stracs e stufts, a deciderin di misurâ la lôr potence sdrondenant il Friûl intîr.

Dit e fat. La prime remenade la de la mont Mariane e e fo une scjassade avonde lizere che e fasè cjapâ e la int un pocje di pôre, ma nuie di plui. Ma la seconde!.....Che Diu nus judi.... la seconde e fo un disastri.

Il S.Simeon par fâsi viodi potent al tacà cun fuarce a movi la tiere; ma fuart, tant di chel fuart che al invià un tarapot mai sintût prime.

"A jerin lis 9 di sere dal 6 di Mai e chês date e restarà par simpri inte storie dal Friûl".

La tiere dut intun moment e tacà a movisi; prime benplan ma dopo simpri plui fuart e tant a lunc che e someà che no volês fermâsi mai plui. Un sunsûr di fâ pôre al vignive fûr di sot de mont e dut ce che al jere in pîts al tacà a colâ. A colarin i cjaminis, a vignirîn jù i sofîts des cjasis, i mûrs si vierzevin in sfêsis simpri plui grandis e de mont a vignirîn ju clapons e slacs spaventôs. Une cjosse di glaçâ il sanc.

Dome par un meracul il nestri paisut nol ve ni muarts ni ferîts grâfs ma la pôre e fo tante e nissun al dismentearà mai chês gnot di za fa cuarante agns. E di sigûr ancje

Robi, un frutut di cinc agns che al viveve alì, si impensarà fin che al vîf de venture di chê sere di Mai.

I siei gjenitôrs a jerin lâts a rosari e lui e so nono a vevin decidût di fâ un zirut in biciclete. Il frut denant e il vecjo daûr, a vevin torzeonât ator pal pais e cuant che si jerin sintûts stracs, a jerin tornâts a cjase.

La mame di Robi tornade dongje de glesie e veve fat il cafè e il nasebon si lu sintive fintremai tal curtîl tant che il nono apene rivât, al le dentri di corse in cusine par bevilu cjâlt. Il frut, tal fratimp, al stave metint la biciclete tal garâs cuant che, un rumôr cetant fuart i fasè cjapâ un grant spac. La tiere si moveve e ancje il pavement de rimesse si niçulave e lui al faseve fadie a stâ in pîts e al capive che alc di grivi al stave capitant.

Robi alore al pensà diret di clamâ sô mari in jutori ma la vôs, purtrop, no i vignì fûr dal cuel e e restà blockade tal pet. Ancje se lui al vierzeve la bocje e al procurave di vosâ, nol rivave a proferî une silabe e i pareve di jessi intun brut sium. Il pavement dal garâs al continuave a trimâ, i mûrs ato ator a si crevavin fasint un fracàs infernâl e lui, simprît plui spaurît, si sintì a mancjâ lis fuarcis e al plombà par tiere cence plui i sentiments.

Sore di lui e colà la biciclete che il nono al veve pojât dongje dal mûr e cheste e fo une fortune parcè che in chel al vignì jù ancje il sofit dal garas che al sarès finît dret sore il frut se no fos stade la bici a fai di ripâr.

Robi duncje al restà sot lis maseriis ma, par fortune, no si fasè un grant mâl....

“Il dut al durà mancûl di un minût ma par ducj a forin i 58 seconts plui luncs de vite”.

La int e capì che chel al jere un taramot di chei fuarts e alore e saltà fûr di presse des cjasis par viodi ce che al jere sucedût e ancje par cjapâ coraggio stant in compagnie. Chel che al comparì denaut dai vôi par altri e fo une robe di no crodi. Ator al jere dut un mis mas e i curtii a jerin plens di robe colade par tiere e di rudinaçs che sdrumantsi dai murs a vevin inviât un fumeron che a respirâlu e someave di scjafoiâsi.

La int e jere incocalide e no saveve ni ce dî ni ce fâ. Cualchidun al vaive, cualchidun al preave e cualchidun invecit al sacraboltave cuintri il S. Simeon che indi veve fate une des sôs... e no jere la prime volte!

La montagne intant e jere disperade e e cirive di tignîsi sù clamant la sô “amie” Mariane. Il S. Simeon al veve pierdude dute la baldance e al sperave che almancûl jê i des un pôc di confuart. La Mariane, invezit, i fasè une gruesse lavade di cjâf e i fasè capî che la sô superbie e veve superât ducj i limits e che la puare int dai dintors e stave pajant pe so arogance. Jê e scrupulave che lis consequencis a saressin duradis a dilunc, e ancje chel brut niçulament, parcè che la tiere e je come une pindule che dopo une gruesse sburtade si niçule fin che e vûl.

I gjenitôrs di Robi intant, jessûts di cjase plens di teme, a vioderin che il frut nol jere intal curtîl come che a crodevin e alore a tacarin a clamâlu a dute vôs. Ducj ju sintirin, ma Robi nol rispuindè e lôr a calcolarin che al fos platât e che al fos masse spaurît par saltâ fûr.

In chel al jessè dal so cucjo il Tobì, il cjagnut di famee, e di presse si invià viers il garâs che al jere mieç sdrumât e al tacà a baiâ come un mat e a sgarfâ intes maseriis come se sot al fòs stât il tesaur scuindût. Ducj lu cjalavin e a pensavin che i vès dat di volte il çurviel pal spavent ma dopo un pôc al nono i vignì tal cjâf che Robi al veve di meti la biciclete propit tal garâs e alore, scaturît, al tacà a vosâ: “Il frut, il frut....di sigûr al è restât sot lis maseriis”... Dute la int intun lamp si de dongje e cence che nissun al vès viert bocje, e scomencà a sgarfâ.

Cui cuntune pale, cui cuntun picon, cui cuntun riscjel.....ducj a fasevin ce che a podevin e chei che no vevin nissun imprest, a sgarfavin cu lis mans. Lis maseriis par fortune no jerin tantis e dopo un moment si viodè a saltâ fûr un pît. Podopo a vignirin fûr lis gjambis e po’ sù sù fintremai che Robi al fo libar dal dut.

Tobi al saltuçave di ca e di là e al bajave di contentece ma la int impen e jere seriôse parcè che il frutin nol rispuindeve e nol dave segnS di vite. Al jere colât in sveniment e ducj a jerin pinsirôs fintremai che une femine, che e faseve la infermirie tal ospedâl di Glemone, ju sicurà disint che il piçul al respirave benon, nol veve gruessis feridis e duncje al jere svignût dome pe pôre. La int e tirà finalmentri il flât e Robi al fo cjamât in machine e puartât di corse tal ospedâl di Udin.

La jù a jerin cjamâts di lavôr parcè che l’ospedâl di Glemone al jere vignût jù, e chel di Tumieç mieç fracassât e i ferîts, che a jerin une vorone, a rivavin ducj a Udin. Distès dut câs cuant che a vioderin che il ferît al jere un frutin, i miedis si derin di fâ di gran presse e, dopo vèlu visitât benon e fats ducj i accertaments che a coventavin, a diserin ai gjenitors che il pazient al veve dome cuatri sgrifignadis e un braçut rot....une cjosse di nuie in confront a tancj che a jerin in cundizions disperadis, e a tancj altris inmò che a vevin pierdude la vite intai paîs plui batûts.

Il probleme plui grues di Robi al jere che, pur jessint tornât di ca, nol rivave a proferî nancje une peraule. I gjenitôrs a jerin disperâts ma i miedis ur diserin che il malan al jere dome un fat gnervôs, che al puès capitâ par un grant scjas, e che dut si sarès comedât di bessôl. Il frut al veve dome di stâ cuiet, cjoli lis medisinis e cuant che al sarès rivât a dismenteâ la pôre, al varès fevelât cence incuarzisi.

Robi al capì e al fo une vore ubidient. Al fasè dut ce che i disevin di fâ e in pôc timp al tornà a cjase come gnûf. Nol tabajave ancjemò ma al saveve che une di lu varès fat cence nancje visâsi.

A pene rivât intal pais al fo tant content di viodi Tobì che lu spietave e ancjemò di plui di incuintrâ i siei amîs dal asîl che i faserin une vorone di fiestis clamantlu di galop a zuiâ cun lôr. Pai siei compagns nol contave se lui nol rivave a cjacarâ, a capivin a svual ce che al voleve dî e a zuiavin insiemi cence problemis.

Lis cjasis dal paîs a jerin, ce plui ce manco, dutis ruvinadis e la int e cirive di comedâlis prime che al tornàs l’Unvier. Tal fratimp, intun grant prât dut in plan, a jerin stadis tiradis sù des grandis tendis di ogni colôr e la int e lozave in maniere provisorie in chês cjasutis di tele colorade. I fruts plui granduts a judavin chei che a lavoravin intes cjasis sdrumadis e chei plui piçui a passavin il timp cuntune mestre che ju tignive a ments e ju puartave a cjaminâ intai prâts dai dintors che in chê stagjon a jerin in plene bielece.

La jerbe e jere di un vert cussì fuart che e someave pustice e i flôrs, che a jerin cetancj, a coloravin il paisaç e, cuant che il soreli ju scjaldave, a mandavin fûr bons odôrs cussì fuarts che a voltis a incjocavin. Al someave che la Nature e vès volût domandâ perdon par chel che la montagne e veve inviât intune gnot di superbie e di matetât.

Framieç di chê jerbe e di chês rosis, a svoletavin une cuantitât incredibil di paveutis che, cui lôr colôrs maraveôs e cul lor svolâ graciôs e elegant, a consolavin i vôi dai frutins e ur fasevin dismenteâ i spacs e lis maseriis.

Fra lis tantis paveutis dai colôrs maraveôs, tant e tant, indi jere une picinine, par nuie bieles, di un colôr cussì smamît che al someave blanc sporc e cussì pôc scjassôse che jê e diseve simpri che la Nature pae fâle e veve doprât dume i vanzums di cjase. Si clamave Rosine e lis sôs bielis amiis la cjalavin dal alt in bas e si vergognavin scuasit che e fòs une di lôr. A jê però no i faseve ni cjalt ni frêt. Jê e veve un altri pinsîr e chel al jere ben plui impuartant dai colôrs.

Une dì, intant che jê e faseve un siumut suntune margarite, un mateon di gjatut i veve implantât lis ongulis intune alute e i veve distacât un tocut. Rosine e veve sintût un grant mâl ma il plui grues cantin al jere che, cheste mutilazion, i impediave di movisi come prime. E faseve une fadie mostre e il so curut al someave sclopâ di un moment in chel altri.

Lis paveutis no àn vite lungje e la sô si stave svinçant a la fin. No podint svolâ Rosine e passave il timp cjalant i frutins che a zuiavin tal prât e soledut e cjalave Robi parcè che e capive che al veve alc che nol lave. Lui al zuiave, al coreve, si platave, al scoltave la mestre ma nol diseve mai une peraule.

Cheî altris fruts a vosavin, si clamavin, si cavilavin. Ma lui nuie, lui al stave simpri cidin. Dispes jê lu viodeve distirât su la jerbe mulisite che al cjalave cheî altris che a cjantavin cu la mestre e i someave che dibot al fasès il blec. Subît dopo par altri, Robi si meteve a cjapâ su lis rosutis par puartâlis a la Madone, che so marî i diseve che lu veve protezût in chê sere di montafin, e podopo al passave il timp spiant il via vai des paveutis che..... cuissà dulà che a lavin, simpri cussì di presse!

E ancje in chê dì al stave fasint la stesse cjosse e Rosine e pensà di fai une improvisade. E svolâ plui fuart che e podeve e e le a poiâsi propit suntune man dal frutin. Robi al restà sbarlumît... Al cjalave cun curiositât chê paveute che, poiade su la sô man e moveve plan plan lis alutis, ma lui nol sintive nissun pês. E jere tant lizere che e someave fate di aiar.

Lui al stave fermin par no spaurîle ma jê e pareve no vè ni pôre ni presse di scjampâ. Robi alore si fasè coragjo e al olsà tocjâle planchin planchin. Rosine e jere piculute, mulisite e e someave fate di vilût. Si lassave cjareçâ batint cun gracie lis sôs alutis e al fo cussì che il frut si incuarzè che intune al mancjave un tocut.

Robi al varès volût judâ che puare besteute feride ma nol saveve cemût fâ e alore al pensà di clamâ la mestre che di sigûr indi saveve plui di lui. Cun dute la vôs che al veve sparagnât fintremai in chel moment, al clamà par non la siore e jê, sintintlu a vosâ e restà incantesemada e corint viers di lui e clamà dongje ducj cheî altris frutins.

Chei a rivarin di buride e ducj contents a volerin sintî ancjemò la vòs dal amì, ma no une volte sole...tantis voltis.... fintrimai che a forin convints che no jere stade una robe di passaç.

Robi al jere plen di gjonde e ancje i siei amîs a fasevin sâlts e zîrs in tont di contentece ma la plui apaiade e jere Rosine, che e stave ancjemò su la manute dal frut e e moveve benplan lis sôs alutis par fâ viodi che e partecipave a chê ligrie cun dut il cûr. E e jere pardabon contente... E veve rivât a “vuarî” il frutut sbatint lis sôs alutis ancje se a une i mancjave un tocut.

E veve fate tante fadie ma cumò e podeve murî contente parcè che e jere sigure di vê vuadagnât un puestut tal Paradîs des paveutis. E Mari Nature, che e sa simpri dut, la varès dal sigûr laudade e salacor, i varès regalât ancje un pâr di alutis gnovis.

E cetant plui coloradis cheste volte. Magari zalis e neris come che i plasevin a jê... In fin dai fats, lis veve ben meretadis no?!....